



PROCLAMACION OFICIAL DI ARUBA

REGULACION MINISTERIAL di 17 di september 2013 pa ehecuta articulo 3 punto 3, articulo 6 punto 7 y articulo 7 punto 4 di e Ordenansa di Cacho (AB 2012 no. 63) (Regulacion doño y identificacion di cacho).

Publica, 20 di september 2013

Minister di Husticia y Enseñansa

A.L.Douwens

Minister di Husticia y Enseñansa,

A tuma den consideracion:

- cu ta deseabel pa stipula regla mas detaya pa tene cacho, accesibilidad na caminda publico pa cacho y identificacion di cacho;

Considerando:

articulo 3 punto 3, articulo 6 punto 7 y articulo 7 punto 4 di e Ordenansa di Cacho (AB 2012 no. 63);

A DICIDI:

Articulo 1

E medidanan, manera indica den articulo 3 punto 1 di e Ordenansa di Cacho (AB 2012 no. 63), ta:

- a. tene e cacho riba un tereno cera cu'n cura traha cu material di bon calidad, adecuado pa tene e cacho paden y cu tin un altura di minimalmente dos biaha e altura di e cacho mas grandi presente of
- b. mara of tene e cacho permanente na liña of
- c. tene e cacho den un cura di cacho cera ("hondenren").

Articulo 2

1. Un cacho, manera referi den articulo 6 punto 3, seccion a. di e Ordenansa di Cacho, mester por wordo identifica pa medio di:

- a. un microchip poni bou di cuero (subcutaneo) of intramuscular pa un veterinario y
- b. un plachi cu e number di e "transponder", pega na e banchi di cacho.

2. Riba peticion donjo di cacho ta entrega un certificado otorga pa un veterinario mencionando e number di e microchip y e fecha cu a pone e microchip.

Articulo 3

Den caso cu mata cacho, base riba articulo 7 punto 3 di e Ordenansa di Cacho, esaki ta sosode unicamente door di un veterinario of un persona cu a haya training pa haci esaki bou responsabilidad di un veterinario. E metodo uza pa un veterinario of e persona indica den e frase anterior mester conduci na un perdida rapido di conocimiento, causando un minimo na dolor of incomodidad cerca e cacho.

Articulo 4

E tarifanan pa tene cacho den detencion manera referi den articulo 7 punto 1 ta determina na Afl. 35,- y ademas:

- a. Afl. 10,- pa dia te un maximo di Afl. 300,- pa cacho cu tin un peso di 20 kilo maximo of
- b. Afl. 15,- pa dia te un maximo di Afl. 450,- pa cacho cu tin un peso di 20 kilo of mas.

Articulo 5

1. E regulacion ministerial aki ta drenta na vigor na momento cu e Ordenansa di Cacho (AB 2012 no.63) drenta na vigor.

2. E regulacion ministerial aki ta wordo referi como: Regulacion pa doño y identificacion di cacho.

A.L. Douwers